

EBILUNBA

¹ U tienu den maadi hali yogu leni ti yajanba bi sawalipuaba ñoana nni yaa yogini n kaa wa leni mabuolu boncianla. ² Moala a dan juodi kaana nni O maadi len ti O bijua ñoabu nni. O den bili ke wan diedi li bonli kuli; leni wane ke, O go tagi li ñandunli. ³ Wani bijua n tie O kpiagidi nannanli, U tienu wani O yaaba yaa maalima. O kubi ñanduna leni O maama yaama n pia u paciamu. wani n den ñuudi ki ñani ti tuonbiadi ki den kali tanpoli joma ti kpiagidi tienu jienu . ⁴ Wan bijua, o den tua yua pia ti kpiagidi ki cie Makinba kelima Wan ba yaa yeli n pia ti kpiagidi ki cieba yeni yaapo. ⁵ Olee Maleki yo ke U tienu yedi: a tie n bijua; N mali ña dinla. be yogunu yo ke O go yedi: N baa tie o ba, o mo baa tien bijua . ⁶ wan den soani O bijakpiaga ñanduna nni O go den yedi: U tienu Malekinba kuli n kpiagi O. ⁷ O go den maadi Malekinba po ki yedi: O teni ke O Malekinba tie nani u faalu yeni O naacenba mo tie nani u mupienu . ⁸ Ama O bijua po, O den yedi: Fini Utienu, A bali kalikaanu baa ye hali o yogunu kuli. A badigbianu mo tie mi teginma gbianu. ⁹ A bua miteginma, ki nani ti tuonbiadi. lan yaapo Utienu, ña Tienu gandi ña, ki wuli ña po li pamanli kpama, ki teni ke ña pia ti kpiagidi ki cie a lieba kuli . ¹⁰ O go yedi: O Diedo, hali mi cilima Fini n tagi ki tinga. Tanpoli mo tie A nu n soani yaa tuonli. ¹¹ Lan kuli baa bodi ama, Fini wani baa ye hali o yogunu kuli; li kuli baa

kpeligi nani li liadili yeni, ¹² A ba kokoli lan kuli nani ku liadigu yeni, ke li kuli ba lebidi; ama fini wani baa tie njan tie maama hali ya yogunu kuli. nA bina mo, ki pia gbenma . ¹³ O lee Maleki yo ke Utienu yedo: kali n najienu hali min baa teni nA yibalinba n tua nA taanma kaanu. naani Malekinba ki tie fuoma kaa? yaaba n tuuni U tienu po. ¹⁴ Wan tuuni yaaba ke ban soani yaaba n baa ba mi tindima faali yaapo .

Dianciamou 2

¹ Lan yaapo li pundi tin kubi bonnanla ya maama ke ti gbadi yeni, ke tin da yaadi ki fuagidi leni laa maama . ² Kelima, ya maama ke Malekinba den waani ya den ba mi gbienma, ke ti tuonbiadi leni yiema buolu kuli mo ya den ba li panpaani, ³ Lan wani, ti baa sani lede ki cia hali ti yaa yie ki fali laa tindimoanma? Laa maama den kpa nani O Diedo noabu nni, ke yaaba n den cengi O den tieni ti po siedi ke mi tie moamoani. ⁴ U tienu den ye leni ba ki ciani bi siedo leni sinankeene, leni libonlidi kaala, leni mi bandicianma buolu buolu leni U tienu Fuoma yua paabu nani wan bua maama . ⁵ Kelima U tienu naa teni Malekinba ka n diedi ya nandunli n kpendi nne, tin maadi yaali yaa maama. ⁶ O nilo den teni siedi kaanu ba ki yedi: o nisaalo tie be hali ka baa tiani o po bi, o nisaalo biga tie be hali ka baa kubi o bonnanla nante ? ⁷ A den jiini o yogunu wamu po, ke Malekinba cie o, A go den jiini o po ti jigidi leni ti kpiagidi. ⁸ A teni ke o diedi li bonli kuli nani wan nma yaala. kelima U tienu n dini o ke wan diedi li

bonli kuli yeni, O naa ŋa li ba kuli ke wani o nisaalo ki diedi. ama, leni moala ti daa nua ke o diedi li bonli kuli . ⁹ Ama yua ke bi den jiiinio, u yogunu waamu po ke Malekinba cie o. wani Jesu moala ti la ke O gbie leni ti kpiagidi, leni ti pagidi kelima wan la mi kuuma fala maama yaapo. lani n teni, leni U tienu ŋanbili, ke O den la fala ki kpe yua kuli po. ¹⁰ U tienu wan yua n die li bonli kuli ke li bonli kuli go ye O nunni, O go den jagi ke niba boncianla n tua O bila ki taani leni O, O kpiagidi nni. lani, O den teni ke Jesu dagidi ki ŋani cain kelima wan la ya fala yaapo. wan yua n tie bi tindima yudaano . ¹¹ Kelima yua n ŋuudi ki ñandi ti tuonbiadi leni wan ŋuudi yaaba ya tuonbiadi kuli ñani baa yendo ya kani. lan yaapo O naa den jie fee ki yinba O waamu. ¹² Wan den yedi: N ba waani A yeli n waamu, n ba yiini ki pagi A yeli li nitaanli siiga . ¹³ O go den yedi: n baa ya dugi a po O go den yedi: Mini nne, Mini leni yaa bila ke U tienu teni nni. ¹⁴ Lan wani, nani a bila n tie nisaaliba ki pia ti gbanandi leni misoama yeni, O moko leni O kuuma, O den paadi yua n pia mi kuuma paalu sutaani. ¹⁵ ki den faaba yaaba ke bi yema kuli bi den ye sutaani yonbidi nni kelima mi kuuma jawaandi po . ¹⁶ Li doagidi cain ke waa den cua ki baa todi Malekinba ka, ama Abalahama puolinuani. ¹⁷ Lan yaapo, li bonli kuli nni O den nandi O waamu. yeni, O tua yaa kopadicianbado n gba mi ninñima ki go tiega U tienu tuonli nni, ki go padi i candanbaani padili ki ba sugili bi niba tuonbiadi kuli po. ¹⁸ Kelima wani O yaaba den la fala ban den tulini O yaa yogunu. O baa

fidi moala ki todi moala yaaba ke bi tulinba .

Dianciamou 3

¹ Lan yaapo n kpiiba bi nigagidiŋanba, yinba yaaba ke Utienu yini, yin teni yi yantiana kuli n jigidi ki nuanli Jesu wan yua n tie tondo leni tin tendi siedi ya dandanli po yaa kopadicianbado. ² O den tiega yua n den puogi o laa tuonli po nani Musa n den tie maama U tienu diegu nni kuli po. ³ Kelima O kpiagidi den cie Musa. nani yua n maa li dieli n pia ti kpiagidi maama ki cie wan maa ya dieli maama. ⁴ Dieli kuli pia li maado; ama yua n maa li bonli kuli tie U tienu . ⁵ Musa den tie nidugika U tienu diegu nni kuli nani o naacemo yeni, ki tiendi siedi U tienu n den baa yuandi ki yedi yaala yaapo. ⁶ Ama Kilisiti yua n tie Bijua U tienu diegu nni tie yua n pundi ti dugidi. O diegu tie tinba hali li yaa tie ke ti kubi hali mi juodima ti dugidi leni ya suginma yaapo ke ti kpiagidi ti yula . ⁷ Lan wani nani Utienu Fuoma yua n yedi maama: dinla, yi yaa gbadi O nialu yin da juagi mani yi pala. ⁸ Yin da juagi yi pala nani i yajaanba n den fiini mi yiema leni mi biigima daali ku fanwalinciangu nni . ⁹ Bi den biigi nni ki bua ki le nni, ba ke bi den la n tuona bi siiga hali bina piina. ¹⁰ Lan wani n pali den beni laa ni fiima po ke n yedi: yogunu kuli bi yen yaadi, baa bua ki bandi n sani nni. ¹¹ Lan yaapo, n den poli n pabienli nni ke bi kan kua n fuodima nni . ¹² Lan wani n kpiiba yin yaa fangi yi yula ke o baa kuli n da pia yaa pali n bia ki go juagi hali ke o baa buli ki ŋa U tienu yua n fo.

¹³ Ama yin yaa tundi i yaba daali kuli tin ba yedi dinli maama. lan tie o ba kuli n da juagi o pali leni ti tunbiadi buandi . ¹⁴ Kelima ti tua yaaba taani leni Kilisiti ki tua yendo li ya tie ke ti kubi bonjanla hali mi juodima tin den cili ki pia yaa dugidi. ¹⁵ Nani moala lan yedi maama: dinla i yaa gbadi O nialu, yin da juagi mani yi pala nani ban den fi ki yie nni ya yogunu . ¹⁶ nmenbi n den fiini mi yiema ban den gbadi U tienu nialu. li yaa tie yaaba kuli ke Musa den gobiba ke bi ñani Ejibiti? ¹⁷ U tienu pali den beni nmenba yaa po hali bina piina li yaa tie yaaba n den tieni ti tuonbiadi ke bi den kpe ke bi kpiema den ba mi fanpienmani? ¹⁸ U tienu den poli ki yedi ke nmenbi n kan kua O fuodima nni li yaa tie yaaba n den yie O maama yaa ka? ¹⁹ Lan wani ti la ke baa den kua O fuodima nni kelima bi pajuaga po .

Dianciamou 4

¹ Lan wani tin fangi mani ti yula, nani ki kua O fuodima ñoanianu daa baa ye, ba ni yendo i siiga n da ti sua ke li pendi. ² Kelima tin gbadi ya labalinamo yeni, bani moko gbadi o ama ban den gbadi yaa maama naa todiba li ba kuli. laa maama naa den kua bi pala nni kelima bi den luo ti dugidi . ³ Tinba yaaba n daani, ti kua laa fuodima nni nani wan yedi yaa maama yaa po: n den poli n pabienli nni ke bi kan kua n fuodima nni. O yedi yeni ba leni wan den suani ki gbeni O tuona kuli hali nanduna tagima yogunu. ⁴ Kelima li pia naankani ke O den maadi li danleledili daali maama ki yedi: U tienu den

fuodi leni O tuona kuli li danleedili daali. ⁵ O go den yedi bi kan kua n fuodima nni . ⁶ Nani yaaba n den kpa ba u ñoanianu naa den fidi kua O fuodima nni kelima bi yiemia po, u folu baa ye bi tianba po ke fidi ban kua laa fuodima nni. ⁷ U tienu go bili dantoali lan tie dinla. O den kpa maadi laa maama Dafidi ñoabu nni hali yogunu ba puoli po ki yedi: “dinla i yaa gbadi O nialu yin da juagi mani yi pala “ ⁸ Kelima Josue yaa den fidi ki kuanba mi fuodima nni, li puoli U tienu kan go bi maadi dantoali maama. ⁹ Lan wani U tienu fuodima daali ye U tienu niba po. ¹⁰ Kelima yua n kua U tienu fuodima nni yen fuodi leni o tuona kuli, nani U tienu n den fuodi leni O tuona maama. ¹¹ Moandi mani ki kua laa fuodima nni. o ba kuli ti siiga n da gbali ki kua kelima o yiema po nani bani yeni . ¹² Kelima U tienu maama fo ki go tuuni leni u paalu, ki mani ki jia ki cie jugisiediñoaliedi buolu kuli, ki mudi ki koa hali deeni ki paadi o naano leni li yantiali, a tuga leni kpaba lonlo laa maama yen bigi li pali nni yanjaga leni li yantiana kuli. ¹³ Tagima ba kuli ki wuo O nintuali, ama li bonli kuli doagidi cain ki se yua ya ke ti ba fa ki togidi ti tuona kuli . ¹⁴ Lan wani, nani tin pia ya kopadicianbado yua n den kua tanpoli, lan tie Jesu U tienu bijua, tin ya se bonjanla ya dandanli yaa niini ke ti tendi siedi. ¹⁵ Kelima tii pia ya kopadicianba n kan fidi ki gbadi ti po mi ninñinma ti tadigu nni. nani tinba, bi den tulini O li bonli kuli nni, ama waa den tieni tuonbiadi. ¹⁶ Lan wani tin nagini leni li papaali li ñanbili bali kalikaanu kani, ki ba mi ninñingbadima leni li ñanbili yaa yogunu

ke ti bua mi todima .

Diancesmou 5

¹ Yaa kopadiciansbado ke bi gandi bi niba siiga kuli tie yua ke bi dini o ke o tuuni U tienu tuonli bi niba siiga. wani yen tiendi mi buama paabu padili leni ti tuonbiadi sugili miabu padili. ² O ba fidi ki juuni leni bi yanpiidanba, leni bi ni yaadikaaba po. kelima wani o ba yen pia ku tadingu mitianma. ³ Laa tadingu po n teni ke li tie tiladi won padi ki mia o yuceli tuonbiadi sugili nani wan padi bi niba po maama . ⁴ Nilo ba kuli kan teni o yuli laa kpiagidi li yaa tie ke U tienu n yini yua li po yaa ka; nani wan den yini Alono maama yeni. ⁵ Kilisiti wani moko naa teni O yuli laa kpiagidi ki yini O yuceli kobadiciansmo, ama O pia laa kpiagidi kelima yua n den yedi o: "A tie n bijua Mini n mali ŋa " ⁶ Nani wan go yedi kaanu ba maama: A tie kobadiciansbado hali ya yogunu kuli nani Melekisedeki yeni . ⁷ Wane, won den ye O gbanadi nni ya yogunu, O den miadi U tienu leni a bubula leni ti ninsiidi i jandi nni ki pugi yua n ba fidi ki fabi o leni mi kuuma. O jandi den ba mi gua lebidima kelima wan den pia ya fangili U tienu po. ⁸ Ba leni wan tie U tienu bijua, O den bangi mi tuoma ya bonli yaa niini ke O den laa fala . ⁹ Wan den teni ke o ŋani ki dagidi cain li bonli kuli yeni, lan yaapo O den cuani yaaba tuo O kuli po ya tindima n kaa pia gbenma. ¹⁰ U tienu wani O yaaba n yedi ke O tie kopadiciansbado nani Melekisedeki yeni. ¹¹ Lan kani, ti pia maama boncianla li po, ya bonli yaa togida n pa kelima yi suangi leni ki ga mi maama

tontomi . ¹² Yinba yaaba hali yogu i bi ŋaa tua bangikaaba, ama hali yen moala, i da go li baa bua ban cogini yi yin baa cili ki bandi yaala U tienu maama siiga. kelima yi tie nani yaaba ñu mi naanjanma ki kan fidi ki je ya jiema n ciagi. ¹³ Ki sua yua n da li baa ñu mi naanjanma bebe, ki bani ki gagidi yaali n tiegi leniyaali n ki tiega kelima o da baa tie canpandiga. ¹⁴ Ama ya jiema n ciagi tie a nikipela po kelima bi yantiana maani ki biigi ki gagidi yaali n ŋani leni yaali n bia .

Dianciamou 6

¹ Lan yaapo, tin cedi tin cicili ki bangi yaa maama n tie li tanpuli Kilisiti nni ki suagi liiga leni yaa bangima n kpedi ki dagidi ki kan go guani ki bili ti tuonkpiema tanputoali tin den yie ya, ² Leni li dandanli U tienu po, leni mi batisima bangima, leni ki maani i nii ki jandi, leni ki jandi ki fiini a tinkpila, leni yaa buudi n ba yuandi ki cua. ³ Ti ba ti yaa tiendi lane U tienu yaa bua . ⁴ Kelima li pa leni yaaba n cili ki ba Kilisiti yenyenma, ki leeni U tienu paabu yaabu n ñani tanpoli po, ki go ba U tienu Fuo ŋanma, ⁵ Ki leeni ki la Utienu maama n mani maama, ki go bandi yaa diema n kpendi yaa paalu; ⁶ Li pa leni bi po, bi yaa yaadi ban go fidi ki lebidi bi pala ki mia sugili. kelima bani bi yaaba n go kpaagi U tienu Bijua li dapoanpoanli po ki go fiagi O asala nni . ⁷ Yaa tinga n yen baadi ke ki taaga mi ki po, ki yaa pudi yaala n pia mi fuoma yaaba n ko ga po, laa tinga baadi U tienu seli. ⁸ Ama ki ya pudi i konkoni leni muadi malikonkoni, kaa pia fuoma ba kuli. ki go tie tinsolinkaaga

li kan waagi leni ban juuga mi fantama . ⁹ N bua kaaba ba leni tin maadi yeni kuli, ti gu ki lee yi kani ke yi tiendi yaali n nani ki go dagidi leni yi tindima po. ¹⁰ U tienu tiega cain, o kan sundi yi tuonnama leni yin den doagidi yi buama O po maama. kelima yi den todi O nigagidiɲanba hali yen moala ke yi go baa todi ba . ¹¹ Ti bua yi niini yendi yendi kuli n nani ki kubi laa yankuali hali mi juodima, lan tie yin ba yin bi sugini yaala. ¹² Yin da yualigi mani yi gbanu, ama yin yaa togidi yaaba n baadi U tienu n niani bi yaala kelima bi dandanli leni bi nianali po . ¹³ U tienu n den niani Abalahama u ñoanianu yaa yogunu O den ta wani O ba yaa yeli ki poli kelima o ba kuli ki ye ki cie O ke O baa poli li daano yeli nni. ¹⁴ Ki yedi: moamoani cain, n baa seligi ɲa ki yaa pugidi a puoliɲuani. ¹⁵ Lan teni Abalahama den juuna ki suagi liiga ki den ba U tienu n niani o yaala . ¹⁶ Bi nisaaliba yaa poli bi yen poli ki taa yua n cie ba yaa yeli. lan tie yaa ñoanianu n kali bi siiga yen teni niama kuli n gbeni. Lan yaapo yo, ¹⁷ U tienu moko den bua ki doagidi waani ke O ñoanianu kan lebidi yaaba yaa po ke O den niani ba ban baa ba yaala. ke O ñoanianu kan lebidi leni wan bili ya yanjagili, O go den poli ki pugini O ñoanianu po. ¹⁸ Laa bonliedili yaali n kan lebidi ki go doagidi ki waani ke U tienu kan pua faama; lani n paagidi ti pala tinba yaaba n sani ki baa O po . ¹⁹ Ti pia ki muubi laa suginma ke mi tie nani o naano ñindabiagu kubikpiagili yaali n ba cuo ki sieni ku ñindapiagu kaanyendu. laa suginma pendi ku cabipigin kaabu ki kua hali

deeni liiga po. ²⁰ Jesu n den kpa galiiga ki kua naani ti po. O tua yaa kopadicianbado n baa ye hali yaa yogunukuli nani Melekisedeki yeni .

Dianciamou 7

¹ Melekisedeki yeni den tie Salema dogu bado, tanpoli joma Tienu yaa kobadiciamo. O den ñani ki tuogi Abalahama wan den paadi bi badiba ki den lebidi ki kuni ya yogunu ki den gaali o. ² Abalahama den teni O piiga biinu wan den baa ya faali yaa niini kuli. O tie mi teginma bado nani O yeli Melikisedeki yeni n bundi maama. leni salema Bado lani n bundi mi yanduanma Bado. ³ Waa pia ba, waa pia na, waa pia yaja, waa pia cilima, waa pia juodima. ama O tua yua n naani nni U tienu bijua. wani Melekisedeki yeni tie kobadicianbado i yoguni kuli . ⁴ Faami mani ki le o kpiagidi n da maama wan yua ke Abalahama den teni O wan den ba yaa faali yaa piigi biinu. ⁵ Levi buolu yaaba siiga yaaba n tuuni li kopadiciantuonli nani U tienu balimaama n bili maama ke ban yaa gaani piiga Isaleleenba yaaba kuli kani bani bi kpiiba baa leni bi kuli n tie Abalahama puolinuanu. ⁶ Melikisedeki baa leni wan kaa tie bi buolu yua, O den ga piigi biinu Abalahama kani ki den gaali o wan yua n den ba U tienu ñoaniani . ⁷ Laa pia kuli niama, yua n waa n yen baadi yua n yaba yaa gaali. ⁸ Nakanba, yaaba n gaandi piigi biinu tie nisaaliba yaaba n baa kpe. ⁹ ama leni Melekisedeki li kadi ki waani ke O fo. ¹⁰ Yaali n go pugini tie ke Levi yua n gaani piigi biinu, moko den pani piigi piinu Kelima hali ke o daa

ye o yaja Abalahama tugu nni, Abalahama den pani piigi biinu Melekisedeki n den ñani ki tuogi o yaa yogunu . ¹¹ Levi buolu kopadicianba tuonli yaali yaapo ke U tienu den teni li balimaama Isaleleenba yaaba li yaabi tie ke ñani ki dagidi cain, naani li go bi tie tiladi kopadiciantoa n cua nani Melikisedeki yeni, ki naa tie Alono buolu yua? ¹² Nani li kopadiciantuonli n lebidi yeni, li tie tiladi li balimaama moko n lebidi . ¹³ Kelima yua yaapo ke laa maama maadi, O tie buoto yua, yaa buolu yaaba siiga ba ni yendo ki suani li badibinbinli tuonli. ¹⁴ Yua kuli bani cain ke ti Diedo Jesu ñani Juda buolu nni, yaa ni buolu ke Musa ki yedi li ba kuli leni yaa maama n tuugi leni li kopadiciantuonli . ¹⁵ Kopadiciantoa n den cua nani Melekisedeki yeni, li go doagidi ki pugini. ¹⁶ O naa den tie bi nisaaliba n dini yaa kobadiciamoka, ama li tie ke O pia yaa miali n kan bodi yaa paalu. ¹⁷ Kelima bi den kpa teni O po yaa siedo n tene: A tie kopadiciamo o yogunu kukuli nani Melekisedeki yeni . ¹⁸ Lan yaapo mi mabilikakpiama bodi kelima maa pia fidu baa kuli, maa go pia todima baa kuli. ¹⁹ Kelima li balimaama naa den fidi ki ñanbi li ba kuli ke li dagidi cain. ama U tienu den yuandi ki cuani ti po ya suginmi n ñani ki cie. ke mi baa teni tin fidi ki nagini U tienu ki cie . ²⁰ Laa bonla kuli naa den tieni kaa taani leni li poli. Kelima Levi buolu yaaba n den tua kopacianba naa den poli, ama Jesu wani tua kopadiciamo leni li poli; ²¹ kelima yua n yedi o yaapo; O yedi: O Diedo den poli, O kan lebidi O maama. O yedi: A baa tie kopaciamamo o yogunu kukuli nani Melekisedeki

yeni . ²² Lan yaapo n teni ke Jesu n tie yua n tie siedi yaa nantaado n nani ki cie yaapo. ²³ Yaalin n go pugini, bi kopadicianba boncianla den kali kelima mi kuuma den teni ke baa fidi ye o yogunu kuli. ²⁴ Ama Jesu wan yua n ye ki fo hali yaa yogunu n kan gbeni yaapo, teni ke O kubi yaa kopadiciantuonli n ye o yogunu kukuli . ²⁵ Lan yaapo, ke O go baa fidi ki faabi cain yaaba kuli n nagini U tienu kelima O yaapo wan yua n ye o yogunu kuli ki fo ki miadi U tienu bi po. ²⁶ O tie tin bi bua yaa kopadicianbado buolu yua n dagidi ti po, ki nani cain, kaa pia tagili baa kuli. tuonbiadi ki ye O niini. waa ta leni ti tuonbiadi danba. O den kpedi hali tanpolijoma . ²⁷ Waa ta leni yaa kobacianbadiba n sieni. daali kuli bi yen padi a pada, bi yen kpa padi bani bi ba ya tuonbiadi po, ki yuandi ki padi bi niba kuli tuonbiadi po. laa bonla O den tieni li kuli yenma ki den puni O yuceli yua kuli po. ²⁸ yaa balimaama n den dindi bi nisaaliba yaa kopacianba den pia ku tadingu kelima bi tie nisaaliba. ama li poli yaa maama yaama n den yuandi ki cua li balimaama puoli, den teni ke bijua tua kopadicianbado wan yua n dagidi ki nani cain hali yaa yogunu kuli .

Dianciamou 8

¹ Tin maadi yaa maama kuli, mi siiga yaalin pia li mayuli tie ke ti pia yaa kopacianbado n kali tampoli U tienu yua n pia ti kpiagidi balikalikaanu o jienu po. ² Lan kane ke O tuuni u kaangagidinamu nni O Diedo wani O yaaba n sieni ya gbandiemoanli, ke o nisaalo ka sienli .

³ Kopadicianbado kuli bi yen dini o ke wan yaa kpendi nni U tienu kani bu paabu leni a pada; naan kani ke li tie tiladi Jesu moko n yaa pia wan baa pa yaala. ⁴ O yaabi ye ki tingi n po, O kaa bi tie ba kopadiciamo moko kelima yaa kopacianba n kpendi nni mi buama nani li balimaama n bili maama da ye. ⁵ Ban tuuni ya tuonli yeni, tie yaali n tiendi tanpoli, li nannanli leni li junjungu. nani U tienu n den kpa wani Musa maama wan den ba sieni li gbandieli ya yogunu ki yedo: njan yaa faami ki tieni li kuli bonnanla nani ya nannanli ke wani na li juali po yeni . ⁶ Ama moala, Jesu pia yaa tuonli n nani ki cie lani, kelima O tie ya nantaado n nani ki cie yaa candanbaalo. yaa nantaado n se u ñoaniannamu po. ⁷ Kelima o nantaadi cialo yaa den pia poado ba kuli, laa den pundi yaala ban lebedo leni o bonyuanlo . ⁸ Kelima li tie leni i jaligi ke O Diedo den maadi leni isaleleenba yaaba ki yedi: diidi O Diedo yedi ke u yogunu kpenda yaa yogunu ke n baa kuani o nantaadi pano Isaleleenba yaaba leni Juda yaaba siiga. ⁹ Ya nantaado n ka ta leni min den kuani leni bi yajanba yua. Min den cuo bi nii ya daali ki dadi ki ñani ba Ejibiti diema nni. kelima baa den tuo ki kubi n nantaado, n moko mii den yagi n yama kelima bi po; O Diedo n yedi maama . ¹⁰ Diidi mani min baa kuani ya nantaado leni Isaleleenba yaaba buolu. O Diedo yedi li yaa puoli, n baa kuani n balimaama bi yantiana nni, n baa diani ma bi pala nni, n baa tie bi Tienu bi mo baa tie n nuba . ¹¹ O baa kuli kan go cogini o yieninlielo, bi o kpiilo ki yedi o; bandi O Diedo, kelima yua kuli baa bandi nni. ki

cili bi siiga ki bonwaaga kaa ca hali o nikipelo. ¹² Kelima n baa paba sugili leni bi tudima kuli po, n kan go yaa tiadi bi tuonbiadi . ¹³ Nani wan yedi: o nantaadi paano yeni li tie ke O doagidi waani ke o nantaadi kpialo kpeligi. ki sua yaali n kpeligi mo tie yaali n podi, lan mo n tie yaali n pendi .

Dianciamou 9

¹ O nantaadi kpelu moko den pia o ñoabona ya n tuugi leni i jandi leni u कांगagidi njamu yu n den ye ki tingi po. ² Lane n teni ke bi caani li gbandieli, u cicili kaanu naan kani ke bi yi u kangagidinjamu. lan kani n pia ki fidisanga tiankaanu, tabili, leni ban bili ya dipen ³ Bu kpalipigni ka liebu liiga pia ban yi naani ukangaginjamu moanu. ⁴ Lie nni den pia wula padibinbinli ban yen ju tulale naani ki go pia ku nantaadi kpaagu yaagu ke wula taabigu ku kaani kuli. wula tadiga mana n den kpie naani den ye ku nantaadikpaagu yeni niini, leni Alono gbianu yu gbianu yu n den bundi, leni o nantaado n diani yaa tana po. ⁵ Ku nantaadikpagu yeni tampoli den pia yaa Malekinke bi yiba Selubaaba nan nana yaalin waani ke U tienu kpiagidi ye li kani, ke bi fiabi den wagini ku nantaadikpagu yeni bulñoaluodi kaanu. laa tie moala n ka ke ti baa togidi yi li kuli . ⁶ Nani li kuli n den bili maama, bi kopadicianba yaaba n tuuni li kopadiciantuonli, bi yen kua o yogunu kuli li gbandieli nni kaankpialu. ⁷ Liigi po u kanlielu li gbandieli nni o kopadicianbado bebe n den bili nni ta yenma, o kan kua kaa kubi ya soama ke o

baa padi wani o yaaba yaa tuonbiadi po, leni bi niba kuli tuonbiadi po . ⁸ Lan kuli U tienu Fuoma yua den bua ki doagidi ki waani ke yaa sanu n baa teni tin kua u kangagidi njanmoanu daa luodi hali li yaa tie ke li gbandieli da baa ye. ⁹ Lan kuli den tie moala nne yaa nannanli, yaali n bundi ke ban cuani yaa paabu leni yaa paada kan fidi ki teni yua n tiendi lani n dagidi cain ke o pali nni siedo n yaa dua. ¹⁰ Mi jiema, li bonñokaala leni mi candinjanma buoli kuli, laa ñoabona kuli den tie o nisaalo n baa tiendi yaala hali milebidima yogunu n bati cua . ¹¹ Ama kilisiti wan den cua ki tie kopadicianbado yaa bonjanla n kpendi yaa po. O den kua ya gbandieli ya niini n yaba ki go nani ki cie, o nisaalo n kaa maa yaali. lani n bundi ke laa tie ya tagima n tiene yaa bonla. O den kua u kaangagidi njanmoanu nni yenma ke li dagidi i yoguni kuli po. ¹² waa den kua leni a pudibuana leni a naabila yaa soama ka, ama leni wani O yaa soacele ki den daa ki faabiti o yogunu kuli po . ¹³ Kelima a budibuana leni a naatona yaa soama, leni o naañoa fantanpienma yaa den ba fidi ki njuudi ki ñani ban mii yaaba yaapo bi joagindi ki teni bi gbanandi n yaa nani, ¹⁴ Kilisiti yaa soama n baa njuudi ki cie, wan yua, leni U tienu fuoma yua yua n ye o yogunu teni ke o den puni o yuli cain U tienu nani yaa padili n kaa pia joagindi ba kuli baa njuudi ti pala siedo leni a tuonkpiema ke yin fidi ki soani U tienu yua n fo yaa po. ¹⁵ Lan yaa po n teni ke O tie o nantaadi paano yaa candanbaalo. nani wan den kpe ki daa bi niba leni yaa tuonbiadi ke bi

den tieni o nantaadikpelo yaa yogunu. lan tie U tienu n yini yaaba kuli baa ba wan den nianba yaa faali n ki pia gbenma yeni . ¹⁶ Kelima li ñoabonjuodi kaali n ña naani, li tie tiladi ke yua n ña laa ñoabonli ban sua ke waa go baa ye. Ban ña ya ñoabonjuodi kaali pia mi fuoma li daano yaa ti ye. ¹⁷ kelima lii pia gbamanu ba kuli, hali yua n ña laa ñoabonlijuodi kaali yaa baa ki ye . ¹⁸ lan yaa po yo ke, ba o nantaadi kpialo den tieni leni mi soama. ¹⁹ Musa, n den waani Isalelee yaaba U tienu balimaama kuli ki gbeni yaa yogunu, o den ta a naatonbila leni a pudibuana yaa soama ki kali taani leni mi ñima, ki go ta i gaalimoani leni Isopi tiidi benu, o den tuu mi soama yeni niini ki mii wan den cogi yaa tili yeni po, leni bi niba kuli po ki yedi: ²⁰ Li ne n tie o nantaado yaa soama, Utienu n bili yi po yua . ²¹ O go den tu mi soama yeni ki mii li gbandieli po leni lin n pia yaa tuonsoantiadi kuli i jaandi po. ²² Nani li balimaama n yedi maama li bonli kuli den ñuudi leni mi soama. kelima mi soama yaa wuli sugili ki ye . ²³ Li den tie tiladi kelima yaa bonli n tie tanpoli yala yaa nannana moko den baa ñuudi yene leni mi soama lan wani ke tanpoli yaa bonmoanla, leni a pada, n yaa ñani ki cie yaali n yene. ²⁴ Kelima Kilisiti naa den kua o nisaalo n tagi yaa kaangagidi ñamu yu naani nni u bonmoanu ya niini ka, ama o den kua tanpoli moala ki ye U tienu kani miadi O ti po . ²⁵ Waa den kua tanpoli ki go baa puuni o yuli nani li padili yeni yogunu n kuli ka, nani o kopadicianbado n yen kua binli kuli maama u

kaangagidi ñanmoanu leni mi soama yeni. ²⁶ Li yaa tie yen ka, li den baa tua tiladi wan cili ki laadi fala yogunu boncianla hali ñanduna cili yogunu; ki sua moala mi juodima yogunu, O cua ki puni O yuli yenma nani li padili yeni o yogunu kuli po, ki bolini ti tuonbiadi . ²⁷ Nani lan bili nisaali kuli po maama, ke o baa kpe yenma, li puoli U tienu n jia o buudi. ²⁸ Li tie yene ke Kilisiti yua n den puni o yuli yenma ki den tugi niba boncianla tuonbiadi. O go baa guani mi liema ki doagidi O yuli ke li kan yaa tie ti tuonbiadi ñanma po ka, ama yaaba n gu O cuama yaa tindima po .

Dianciamou 10

¹ U tienu balimaama yaama n pia yaa bonjanla n kpendi yaa junjungu ke li naa tie li moano ka kan fidi faabada ba leni a pada ya ke bi tiendi o yogunu kuli binli nni, ki teni yaaba tiendi laa pada n dagidi cain. ² Lani yaabi baa tuo, bi kan go bi yaa baa pada kelima yaaba n tiendi laa pada, bi yaabi ba fidi ñanbi cain yenma, bi kan go bi yaa ba ki pia bi tuonbiadi siedo bi pala nni. ³ Ama bi tuonbiadi tiadima po yen teni binli kuli ban padi. ⁴ Kelima li kan tuo a naatona leni a pudibuana soama n fidi ki ñani ti tuonbiadi . ⁵ Li tie lan yaapo ke Kilisiti n den kua ñanduna nni yaa yogunu, O den yedi: ñaa den bua padili baa kuli bi, paabu ba kuli, ama A den tagi n po ti gbanandi. ⁶ ñaa go den tuo ki ga a padijukaana bi, ti tuonbiadi sugili yaa pada. ⁷ Lan wani n den yedi: diidi, n cua ki baa tieni a yanbuama U tienu kelima li balimaama

tili nni li den maadi min yaa maama yo . ⁸ O den kpa yedi: ɲaa den bua, ɲaa go den tuo ki ga a pada bi, bu paabu; baa padijukaali bi, ti tuonbiadi yaa pada. ba ke laa pada den ɲua li balimaama n bili maama. ⁹ O den yuandi ki yedi: diidi n cua ki baa tieni a yaa yanbuama; lan tie ke o bolini li bonciala kelima o bua ki kaani li bonyuanla. ¹⁰ Laa yanbuama yaa po n teni ke ti ba mi candiɲanma kelima Jesu Kilisiti den puni O gbanandi nani li padili yeni yenma yua kuli po . ¹¹ Kopadicianmo kuli yen se o tuonli kaanu daali kuli ki tuuni li kopadiciantuonli, mi tianma, o yen padi padibuoyendu, yaa pada n kan fidi ki ɲani ti tuonbiadi hali abada. ¹² Ama kilisiti wani, O den tieni padiyenli bebe ti tuonbia po, ki yuandi ki ban kali o yogunu kuli po U tienu balikalikaanu jieno po. ¹³ O gu moala O yibalinba n tua o taanmaakaanu. ¹⁴ Kelima wan puni O yuli maama yenma yeni, O teni ke wan gagidi ki ɲanbi yaaba leni o soama yeni, ke bi dagidi cain o yogunu kuli po . ¹⁵ U tienu fuomi yua moko tieni ti po siedi ke li tie yene. kelima O den kpa yedi: n baa kuani bi po yaa ɲantaado n tienna, ¹⁶ O Diedo go yedi yaa dana tienna yaa pendi n baa tieni n balimaama bi pala nni n go baa dianma bi yantiana nni ¹⁷ O go den pugini ki yedi: n kan yaa tiadi bi tuonbiadi po, n kan go yaa tiadi ban tieni yaa tudima. ¹⁸ Lan wani, ti tuonbiadi sugili n ye naan kani kuli, padili naa go ye ti tuonbiadi po . ¹⁹ Lan yaapo n kpiiba, nani tin baa jii fidi ki kua u kaangagidi ɲamu nni kelima Jesu soama po, ²⁰ O den luodi ti po yaa sanpaanu n fo ki pendi bu

kpalidoaginkaabu, lan tie ti gbanandi. ²¹ Nani tin pia yaa kopadicianbado yua ke bi dini U tienu diegu po yeni, ²² Lan wani tin nagini U tienu leni payenli ke ti pala gbie leni li dandanli, ke ti pala siedo joagindi njuudi ki ñani, ti gbanandi moko njuudi leni mi ñinñanma . ²³ Tin kubi bonñanla tin pia yaa suginma siedo kelima yua n nianti u ñoanianu tie dugika. ²⁴ Tin yaa faami mani ki guu ti yaba, ki tigin ti yaba mi buama leni a tuonñama nni. ²⁵ Tin da ña mani ti tanma nani bi tianba n maani maama, ama tin yaa paagidi ti lieba pala, nani yi moko n nua ke O Diedo daali nagidi yeni . ²⁶ Kelima ti yaa bandi i moamoani, ki nan go yuandi ki tiendi ti tuonbiadi leni ti yanbuama, padili naa go ye ti tuonbiadi po ²⁷ Ama yaa cuonu n bia, leni mi fantanbiadima gu ki baa bolini bi niyiekaaba . ²⁸ Yua n den miidi Musa balimaama kuli, tie yua ke bi baa kpa o ke ninñingbadima kuli ki ye; siedinba lie bii bi ta ñoabu nni. ²⁹ Lan wani, yua n fali U tienu bijua ki nua ke o ñantaado yaa soama yaama n den njuudi ki ñanbi o yeni tie fanma, ki go sugi li ñanbili paabu fuoma, naani o yaa cuonu ka baa yaa bia ki cie ? ³⁰ Kelima ti bani yua n den yedi: Mini n tie yua n yen tuu li panli Mini n tie yua n baa tuu yi biadima panpaani. O Diedo go den yedi: O Diedo baa jia o niba buudi ³¹ Li tie yaa bonla n bia ki i jeje hali boncianla yua n ba U tienu yua n fo nuunni ³² Yin tiadi mani yaa dana n pendi po; yaa yogunu ke yi yama den yendi, ke ba leni fala siiga yi den moani li moacianli ki den se ke li paa

lienni. ³³ mi tianma bi yen fiagi yi ki go wangi yi fala bi niba kuli nintuali, yogunu baa mo, yi yen taani yen ban wangidi yaaba fala. ³⁴ Yi den pia mi ninñingbadima a kpaada po. yi go den tuo ki mangi yi pala leni bi niba n den fie yi piama, kelima yi bani ke yi pia yaa ñalimano n ñani ki cie ki go baa ye o yogunu kuli . ³⁵ Lan wani, yin da ña mani yin pia yaa dugidi yaadi n pia yaa panpaani n yaba. ³⁶ Kelima li pundi yin yaa se ke li pa, lani n tie ke, yi yaa tieni U tienu yanbuama ki dudi, yin baa wan den niani yi yaala. ³⁷ Li go sieni u yogunu waamu bebe, yogun jenjenga, ke yua n ti cua n cua ke li kan waagi . ³⁸ N nitegini ka baa ye ki fo kelima li dandanli po, ama o yaa guani puoli n pali kan mangi o po. ³⁹ Tinba wani, ti naa tie yaaba n baa guani puoli ki bia ka; ama yaaba n pia li dandanli ki baa ciadi bi naani .

Dianciamou 11

¹ Li dandanli tie yua n pia ti dugidi ki bani cain ke o baa ba wan sugini ki baa yaala, ki doagidi ki wani ke o pia, ba wan kaa da nua yaala. ² Bi kpiaba n den pia yaa dandanli yaapo n teni ke Utienu tendi bi siedinamo. ³ Li tie leni li dandanli yaapo ke ti bandi ke ñanduna den tagi leni U tienu maama. ki teni ke tin nua yaala moala ñani tin ki nua yaala yaa niini . ⁴ Li tie leni li dandanli yaapo ke Abela den padi U tienu po yaa padili n ñani ki cie Kayina yaali, kelima o dandanli yaapo U tienu den doagidi ki yedi ke o tiegi ki den ga o padili. li go tie laa dandanli yaapo ke o baa ki maada ba leni wan kaa ji ye . ⁵ Li tie leni li dandanli yaapo ke U tienu den

taa Enoka ke waa den bandi mi kuuma baa go den laa o kelima U tienu den taa o. hali U tienu daa den taa o o den ba siedi ke o tie yua ke U tienu pali mani o po. ⁶ Lan wan yua n ki pia dandanli o kan fidi ki mangi U tienu pali. kelima li tie tiladi yua n bua ki nagini U tienu n daani ke U tienu ye, ke yaaba n lingi O kuli baa ba i panpaani . ⁷ Li den tie leni li dandanli yaapo, ke U tienu den liidi ki waani Nowe yaa bonla n baa tieni ba ke o baa kuli daa den nua la. ke U tienu fangili jeje den cuo o ke o den kpie ku ñindabiaciangu, ki baa faabi o diegunni yaaba. leni lani, o den buni ki cuo ñanduna. o den ba U tienu kani li moamoansaali ke o tie nitegini ka yaali n baadi leni li dandanli . ⁸ Li tie leni li dandanli yaa po, ke Abalahama den tuo U tienu yiinu, ki den fii ki gedi wan baa ba ki diedi yaa diema yaa niini. o den gedi ba leni wan kaa den bani wan caa naani. ⁹ Li tie leni li dandanli yaapo ke o den gedi ki ban kali nani o nilamo yeni, U tienu n den niani o yaa tinga yaa niini. o den ye a gbandiena nni leni Isaaka leni Jakobo ban yaaba n den taani leni o ki ba laa ñoanianu. ¹⁰ Kelima o den guudi ki baa le yaa dogu yaa tanpuna n paa. naani ke U tienu wani O yaaba, n tie yua n diani laa dogu ki go tie u maalo . ¹¹ Li tie leni li dandanli yaapo ke Sala o yaaba, baa leni o bina n den pendu leni wan ma, U tienu den teni ke o fidi ki ba u buolu, kelima o den dugi yua n niano yeni yaapo. ki bani ke O tie dugika. ¹² Lan yaapo, leni jayendo, ba ke o den podi ki cuaga, o den mala yaa puolinuani n kaa pia cuali nani tanpoli ñmabina, nani yaa tanbiima n ye mi ñincianma

kunu ban kan fidi ki cuadi yaama . ¹³ Bi kuli den kpe leni li dandanli kaa den fidi ki ba yaa bonla ke U tienu den nianba, ama bi den tuodi ki la laa bonli kuli hali fuagima ki den mangi bi pala li po; ki tuo ke bi tie canba leni sancenba nanduna nni. ¹⁴ Yaaba n maadi yeni doagidi ki wani ke bi lingi bi doguceli . ¹⁵ Bi yama yaa den baali ban den ñani yaa dogu po, bi den baa fidi ki guani li po. ¹⁶ Ama bi den lingi yaa dogu n nani ki cie; lan tie tanpoli diema. lan yaapo laa pia U tienu po fe leni wan tuo ke bi yini O bi Tienu. kelima O bogini bi po u dogu . ¹⁷ Li den tie leni li dandanli yaapo, Abalahama ki baa padi Isaaka, U tienu n den biigo yaa yogunu ke o den tuo ki baa padi o bonjayenyenga baa ke o den ba U tienu ñoanianu. ¹⁸ Wan yua ke U tienu den niani o ki yedi: leni Isaaka yaa kani a baa ba u puolunuanu. ¹⁹ O den tia ki bani ke U tienu pia u paalu, O baa fidi ki guani ki fiini ba a tinkpila. lan yaapo O baa fidi ki guani ki fiini Isaaka baa o yaa kpe . ²⁰ Li den tie leni li dandanli yaapo, ke I saaka den gaali Jakobo leni Esayu kelima yaali n kpendi yaa po. ²¹ Li tie kelima li dandanli yaa po Jakobo wan den baa kpe yaa yogunu, o den ñii o gbianu yuli po ki gaali Josefi bila, yendi yendo. ²² Li den tie leni li dandanli yaapo, Josefi n den nagidi mi kuuma yaa yogunu, o den maadi I saleleenba yaaba buolu ñama Ejibiti diema nni, ki go den bili li ñoabonli yaali n tie o tinkpikpaba maama . ²³ Li den tie leni li dandanli yaapo, ke Musa madi yogunu, o danba den wuoni o hali nmaali taa. kelima bi den sua ke ki bigi yeni den

ɲani, baa den jie o bado ñoabonli. ²⁴ Li den tie leni li dandanli yaa po, Musa n den fandi, o den yie ban yino Falono bisalo bijua. ²⁵ O den faadi ki taani leni U tienu niba ki lee fala ki cie wan mangi o pali leni ti tuonbiadi yemanma o yogunu waamu bebe yaa po. ²⁶ O den nuanla ke o yaa laa i fee nani Kilisiti yeni li tie o po piacianma ki cie Ejibiti ɲalimano kuli, kelima o den nua wan baa ba yaa panpaani liiga . ²⁷ Li tie leni li dandanli yaapo, ke o den ñani Ejibiti dogu nni, kaa jie Ejibiti bado pabienli. o den se ke li pa o yanjagili nni kelima o den nua o baa kuli n ki nua yua. ²⁸ Laa dandanli yaa po o den teni ke bi bogini ki tieni pak, mi pendima janma, ke bi go den mii mi soama bi dienna buliñoana po. Iani n tie mi kuuma Maleki n da sii Isaleleenba yaaba bonjakpiala . ²⁹ Li de n tie leni li dandanli yaapo, ke Isaleleenba yaaba den tagini mi ñincianma nani ki tinkuongi yeni, ama Ejibiti yaaba, yaaba n den biiga ki baa laa ñincianma siiga, mi den naliba. ³⁰ Li tie leni li dandanli yaapo, ke Jeliko bilinciamu den baa yaa yogunu ke Isaleleenba yaaba den cuoni ki lindi u hali dana lele. ³¹ Li tie leni li dandanli yaapo, ke li poconconli Lahaba ki den taani ki bodi leni U tienu niyiekaaba kelima o den gaa Isaleleenba niba yaaba n den cua ki baa diidiu dogu. o den ga bi cangu bonɲanla ki den todiba . ³² N go baa yedi be ki pugini? mii pia o yogunu ki baa maadi Jedeyono maama leni Balaka, leni Samisona, leni Jefite, leni Dafidi, leni Samieli, leni bi sawalipuaba yaa maama kuli. ³³ Ban kuli leni li dandanli, bi den koani ki paadi i dogi ki tieni yaali n tiega ki go den baa Utienu

n nianba yaala, ki den luoni i yangbanli ñoana,
³⁴ Ki den gbindi mi fantanbiadima jama, ki sani
 ki ciadi leni mu jugisiemu, ki paagi leni i yiani, ki
 tie jakoanda bu toabu nni, ki teli bi nilanba toa
 tuada . ³⁵ Puotanba den laa bi kpiiba ke bi den
 guani ki fii bi tinkpiba siiga. bi waani bi tianba
 fala hali ke baa den tuo mi faabima kelima bi
 bua ki baa yaa tinkpifima n ñani ki cie. ³⁶ Bi
 den ñuadi bi ne, ki puaba leni i febi, ki loli ki
 kpa bi tianba, ki kuani bi ne a kpaadi diena nni,
³⁷ Bi den teni ke bi lugidi bi tianba a tana, ki
 jia ki jendi bi ne, ki waanba o falaciamo, ki kpa
 bi tianba leni mu jugisiemu, bi tianba den yie
 ti pegbandi leni ti nuagbandi ki caa i kankaani
 kelima bi den luo li bonyiekaala, ke bi niba den
 bia bi po, ki go wangiba fala, ³⁸ ñanduna naa den
 dagidi kaa pia laa nimoanba, bi den gaandi mi
 fanpienma nni leni a juana nni leni ti jualondi
 nni, leni i tinfali nni . ³⁹ Ba ke ban kuli den
 baa ke U tienu tieni bi po o siedinamo kelima
 bi dandanli yaapo, baa den ba wan den nianbi
 yaala, ⁴⁰ Kelima Utienu n den jagi ti po yaa
 bonñanla yaapo teni ke bi kan fidi ki ñanbi ki
 dagidi cain li yaa tie leni tinba yaa ka .

Dianciamou 12

¹ Lan wani ti moko, nani siedinba boncianla n
 linditi nani ku tawaligu yeni, tin yie tugili kuli
 yaalin tie tuonbiadi yaadi n baa lindi ti faala,
 tin yaa tiini leni li juunli ya nuama n bili ti po.
² Ki nua Jesu wan yua n tie li dandanli cilika
 leni li ñanbi ka; kelima ya pamanli n den bili
 ki gu o yaapo, O den tuo li dapoanpoanli yaa

kuuma, ki fali⁶ ya fee n ye lienni ki kali U tienu balikaalikanu O jienu po. ³ Yin tia mani Jesu po, wan yua n den tuo ki juuni leni ti tuonbiadi danba len ban den yie O po maama kuli, ke yi moko n da coagi ki luo li papaali ki gbali . ⁴ Yi naa da moani leni ti tuonbiadi hali ke yi soama wuli. ⁵ Yi go sundi yin den ba yaa tundi U tienu kani nani O bijaba. O den yedi: «n bijoa, ñan da fali O Diedo n wani ña yaa fala ke li tie tundi ña po. ñan da go luo li papaali yaa yogunu ke O funi leni ña. ⁶ Kelima O Diedo yen tundi leni fala wan bua yua. O yen pua wan tuo yua kuli ke o tie o biga» ⁷ Yin juuni mani leni laa tundi. O tiendi yeni kelima O nua yi ke yi tie O bijaba. ki laa bonjagi nye ke o ba kan tundi o? ⁸ Ama bi yaa ki tundi yi nani a bila kuli n baadi yaa tundi leni fala, yi tie kpiaba yo yii tie bimoana . ⁹ Baa ti danba yaaba n tie nisaaliba den tundi ti leni fala ke ti den fangi ba. naani laa pundi tin bini ti yula leni ti ba yua n ye tampoli ki ba li miali? ¹⁰ Ti danba den yen tunditi leni fala u yogunu waamu bebe yaa po nani ban bua maama, ama Utienu wan tunditi ti ñamu yo, ki bua tin taani leni o ki yaa ñani nani wan yeni. ¹¹ Li tie moamaoni, i tundi leni fala kuli daa yen tie pabiili bonla, laa yen tie pamanli ka ama li yen yuandi ki cuani yaaba n ga li bangima po yaa bonluonkaala n kpendi nni mi teginma mi yanduanma nni . ¹² Lan wani yin paagi mani yi nii yii n yualiga leni yi duna ya tadi. ¹³ Ke yi taana n yaa ñua ya sani n tiega, yua n diani taali n kpigidi ama lin paagi ¹⁴ Lingi mani mi yanduanma leni bi nibi kuli, leni mi

gagidiŋanma, kelima yua n kaa pia mani o kan lee O Diedo. ¹⁵ fangi mani yi yula ke o baa kuli n da muni o yuli leni U tienu ŋanbili; yaa jiinu nto kuli n da pudi tii po ki ña a benkpela, ki cuani ti yanyagidi ke lan da puodi nibi boncianla. ¹⁶ Yin go fangi mani i yula ke yi siiga n da pia concondaano bi, yua n fala yaalin n gagidi ŋani nani Esayu yuan den kuaadi o nikpedi mi jiema po. ¹⁷ Yi bani ke li yaa puoli, yaa yogunu ke o den bua o ba n gaali o, o den yie o po; ba leni wan den lingi leni ti ninsiidi. kelima o moe naa den fidi ki lebidi li baa kuli . ¹⁸ yi daa kpa nagini yaa juali ke bi den baa fidi ki siili ama ke li den cuo mi fantama leni kugbagbabiadigu, leni li biigicianli, leni ku faaliciangu, ¹⁹ leni kakaaci piebima Bi u niali ciamu fuugu n den ye naankani, ke ba yaaba n den gbadi laa nialu ke wun da go maadi ba mayenma ki pugini. ²⁰ Kelima baa den fidi yaa ñoabonli n tiena: baa yangi yaa sii laa juali bi baa lugidi o a tana. ²¹ Ban den laa yaali yeni, den pia i jeje hali ke Musa n yedi: ti jiwaandi cuo nni hali ke n digibi . ²² Ama yinba won nagini Siyono juali, U tienu yua n fo dogu, tanpoli Jelusalemo, Malekinba tuda tuda kuli n taani naankani ki yiini. ²³ U tienu bi kpiala kuli taanli nni yaaba yaa yela n diani tanpoli. yi cua U tienu kani wan yua n tie bi niba kuli bujialo leni bi niba kuli Tienu. yi cua bi niteginkaaba naani n ye naankani yaaba n ŋani ki dagidi cain. ²⁴ Yi nagini Jesu kani wan yua n tie o ŋantaadipaano candanbaalo, leni o soama yaama n den wuli ki ŋuudi yi, ki go maadi yaa maama n ŋani ki cie Abela yaa soama n den maadi yaala . ²⁵ Fangi

mani yi yula ki da yie ki kan cengi yua n maadi leni yi. kelima yaaba n den yie ke bi kan cengi yua n den soagindi U tienumaama nanduna nni yaa den fidi sani ki cia, ti moko baa tieni lede ki fidi ki cia hali ti yaa yie ke ti kan noadi tanpoli yua maama. ²⁶ Wan yua ke O nialu den digibi ki tinga. ama moala O nianti yaa noanianu tie nne: «yenma goga, ki tinga bebe ka baa digibi ama leni tanpoli moko» ²⁷ Lan yedi: yenma goga, li waani ke mi lebidima baa tieni yaali n digibi kuli kani, nani lan tie bontagi kaali yeni yaa po; lani n tie yaali n kan digibi mo n suagi liiga ki yaa ye. ²⁸ Lan yaapo, nani tin baa ba yaa diema n kan digibi yeni, tin yaa ye leni i tuondi ki kpiagidi U tienu leni a tuonjama dagidi O po. leni O fangili nni. ²⁹ kelima ti Tienu go tie yaa fantami n di .

Dianciamou 13

¹ Yaa suagi mani liiga leni mi buama yi kpiiba po, ² Yin da sundi ki yaa gaandi bi niba cangu. yeni bi tianba den ga Malekinba cangu kaa bani . ³ Yin yaa tiadi mani a kpaada po nani yi moko nani yi moko taani leni bani ki tie kpaada yeni, yin yaa go tiadi yaaba n laadi fala nani yinba yi yaaba moko n ba fidi ki lee laa fala buolu yi gbanandi nni yeni. ⁴ Yua kuli n jigini li niigili, ke joa leni poa taayien u duanu kani n da naa leni joagindi kelima U tienu baa jia yaaba n ye ti joagindi nni leni conconma buolu kuli danba . ⁵ Yin da pa mani i yula mi ligi buama, ama yin mangi yi pala leni yin pia yaala, ⁶ kelima U tienu wani O yaaba yedi: N kan njaa njaa faabada

N kan lu ŋa faabada Lan wani leni papaali ke ti baa fidi ki yedi: O Diedo tie n todi ka, n kan jie li ba kuli; o nisaalo ba fidi ki tieni be ? ⁷ Yin yaa tiadi mani yi gobidi kaaba po, ban yaaba n den wani yi U tienu maama. diidi mani ki lee bi yema n juodi maama yin ŋoadi bi dandanli fuuli. ⁸ Jesu Kilisiti o tie yendo wonla, dinla, leni yaa yogunu n kan gbeni . ⁹ Yin da teni bangitoo canma n yaani yi pala kelima li ŋani li pali n ya gbie ki paa leni li ŋanbili, ki lan da tie leni mi jiema ka, kelima yaaba yaaba n puni bi yula li po, laa todiba leni li ba kuli. ¹⁰ Ti pia yaa padibinbinli ke yaaba n tuuni li gbandieli nni naa pia u sanu ki je li jiema. ¹¹ Yaa yandi ke o kopadicianbado padi ti tuonbiadi po ki kuani mi soama u kaangagidi ŋamu nni, bi yen ñani ban kodi yaa yandi ki sia hali nii n po . ¹² Lan yaapo ke Jesu moko wan den bua ki ŋanbi ki ñani bi niba tuonbiadi, leni o soaceli, o den laa fala kiden kpe u dogu buliñoabu nii n po. ¹³ Lan wani tin ña mani ki gedi O poo nii n po ki taani leni o o fee nni. ¹⁴ Kelima yaa ŋandunli n yene niini tin ye naani ti pia yaa diema n ba yaa ye u yogunu kuli, ama ti lingi yaa diema n kpendi nne . ¹⁵ O yaa po tin yaa tendi U tienu o yogunu kuli ti pagidi nani li padili yeni; lan bundi ke ti ñoacuuna n ya pagi o yeli. ¹⁶ Yin da sundi ki yaa tiendi mi ŋanma leni ti bulcindi kelima laa padili buolu n yen mangidi U tienu pali. ¹⁷ Yin yaa tuodi mani yi gobidi kaaba ki go ya pia bi po li fangili kelima bi guu yi naani kelima bi faa togidi U tienu nintuali. yin yaa tiendi yeni lan tie

ban ya tuuni laa tuonli leni li pamanli ki lan ya tie leni li dunli kelima laa pia yi po todima baa kuli . ¹⁸ Yin yaa jandi ti po, kelima ti tama ke ti pia o siedi n̄amo ti pala nni ti bua li bonli kuli nni ki yaa pia yaa tagu n̄ani. ¹⁹ N go baa miadi yi yin yaa tiendi yeni lani n tie min fidi ki cua yi kani tontomi ²⁰ Mi yanduanma Tienu yua n den fini ti Diedo Jesu O yankpan̄amo bi tinkpiba siiga kelima O soama yaami n kuani yaa n̄antaado n baa ye o yogunu kuli po, N teni yin fidi ki yaa tuuni a tuon̄ama ki go tiendi o ²¹ yanbuama. Wan yaa tiendi i yemi nni yaali n dagidi o po kelima Jesu Kilisiti po wan yua n die ti kpiagidi yaa yogunu n tu u yu! Amina ! ²² N go miadi yi n kpiiba, yin tuo ki ga i naa tundi kelima n diani yi waamu bebe liga. ²³ Yin bandi ke bi luodi ti kpiilo Timote, o yaa cua n kani tonma ti baa yegi ki cua ki lee yi. ²⁴ Yin fuondi mani yi gobikaaba kuli leni U tienu nigagidi n̄anba kuli; Italia yaaba moko fuondi yi. ²⁵ U tienu n̄anbili n yaa ye leni yi kuli Amina !

Bible Gourma
The New Testament in the Gourmanchéma language
of Burkina Faso, Niger, Benin, and Togo
Le Nouveau Testament en langue Gourmanchéma du
Burkina Faso, du Niger, du Bénin et du Togo

copyright © 2020 Door 43 world-wide mission community

Language: Gourma (Gourmanchéma)

Dialect: Central

Translation by: Door 43 world-wide mission community

Contributor: Gourmanchema, Wilson, gux4-ner, Jean Sandamba, Ouoba K. David, Parfait-Ayanou

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-06-16

PDF generated using Haiola and XeLaTeX on 21 Feb 2024 from source files dated 31 Aug 2023

1168f00b-eabf-5a7b-9fed-4d2120867558